

Broj: 03-02-766/2025
Sarajevo, 26.05.2025. godine

**PARLAMENT FEDERACIJE
BOSNE I HERCEGOVINE**

- Predstavnički dom -
gosp. Dragan Mioković, predsjedavajući
- Dom naroda -
gosp. Tomislav Martinović, predsjedavajući

Poštovani,

U skladu sa članom IV.B.3.7.c) (III) Ustava Federacije Bosne i Hercegovine, a u vezi sa čl. 163., 164. i 165. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i sa čl. 155., 156. i 157. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09, 24/20 i 60/24), radi razmatranja i prihvatanja, dostavljam Vam **NACRT ZAKONA O KOMORI INŽENJERA U OBLASTI GRAĐENJA FEDERACIJE BOSNE I HERCEGOVINE**, koji je utvrdila Vlada Federacije Bosne i Hercegovine na 55. sjednici, održanoj 26.05.2025. godine.

Nacrt zakona se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,


PREMIJER
Nermin Nikšić

Prilog:

- Nacrt zakona na bosanskom jeziku (CD)
- Izjava o usklađenosti
- Obrazac broj 2
- Obrazac IFP-NE

Co: Federalno ministarstvo prostornog uređenja
gosp. Željko Nedić, ministar

**BOSNA I HERCEGOVINA
FEDERACIJA BOSNE I HERCEGOVINE
VLADA**

„EI“

NACRT

**ZAKON O KOMORI INŽENJERA U OBLASTI GRAĐENJA
FEDERACIJE BOSNE I HERCEGOVINE**

Sarajevo, maj 2025. godine

ZAKON O KOMORI INŽENJERA U OBLASTI GRAĐENJA FEDERACIJE BOSNE I HERCEGOVINE

POGLAVLJE I - OPĆE ODREDBE

Član 1. (Predmet zakona)

Zakonom o Komori inženjera u oblasti građenja Federacije BiH (u daljnjem tekstu: Zakon) uređuje se temeljna organizacija, djelokrug, javne ovlasti i članstvo u Komori inženjera u oblasti građenja Federacije BiH (u daljnjem tekstu: Komora), uređuje se javnost rada Komore, tijela Komore, opšti akti koje donosi Komora, upisi u imenike Komore, mirovanje i prestanak članstva u Komori, kvaliteta pružene usluge u poslovima projektovanja, građenja, nadzora i prostornog planiranja, disciplinska odgovornost ovlaštenog inženjera (arhitekture, građevinarstva, saobraćaja, mašinstva, elektrotehnike i drugih koji učestvuju u projektovanju, izvođenju, nadzoru, prostornom planiranju i ostalim poslovima vezanim za projektiranje, građenje i planiranje), profesionalno osiguranje i osiguranje od odgovornosti, prekršajne odredbe i nadzor nad provođenjem Zakona.

Član 2. (Usklađivanje sa pravnim aktima EU)

- (1) Ovim Zakonom vrši se usklađivanje sa pravnim aktima EU: Direktivom 2006/123/EŽ Evropskog parlamenta i Vijeća od 12. decembra 2006. godine o uslugama na unutarnjem tržištu, Uredbom (EU) 2016/679 Evropskog parlamenta i Vijeća od 27. aprila 2016. godine o zaštiti pojedinaca u vezi s obradom ličnih podataka i o slobodnom kretanju takvih podataka, te o stavljanju van snage Direktive 95/46/EZ (Opšta uredba o zaštiti podataka) - posljednja prečišćena verzija od 04. maja 2016. godine i Direktive 2005/36/EZ Evropskog parlamenta i Vijeća od 7. juna 2005. godine o priznavanju stručnih kvalifikacija - posljednja prečišćena verzija od 20. juna 2024. godine.
- (2) Ovim Zakonom u zakonodavstvo Federacije Bosne i Hercegovine djelomično se preuzimaju propisi EU iz stava (1) ovog člana.

Član 3. (Pojmovi i definicije)

Pojmovi i definicije upotrijebljeni u ovom Zakonu imaju značenje određeno posebnim zakonima kojima se uređuje obavljanje djelatnosti u upravnom području prostornog planiranja i korištenja zemljišta na nivou Federacije BiH.

Član 4. (Rodno značenje izraza)

Izrazi koji u ovom Zakonu imaju rodno značenje koriste se neutralno i odnose se na muške i ženske osobe.

POGLAVLJE II – ORGANIZOVANJE KOMORE

Član 5. (Oblik djelovanja)

- (1) Komora je samostalna stručna organizacija koja čuva ugled, čast i prava ovlaštenih projekatana, voditelja radova građenja/izvođenja, stručnog nadzora i prostornih

planera, promoviše, zastupa i usklađuje njihove zajedničke interese pred državnim i drugim tijelima u zemlji i inostranstvu, te se stara o tome da savjesno i u skladu sa zakonom i javnim interesom obavljaju svoje poslove.

- (2) U Komoru se udružuju osobe iz stava (1) ovog člana, radi zastupanja i usklađivanja zajedničkih interesa, zaštite javnog interesa i zaštite interesa trećih osoba.
- (3) Osobe iz stava (2) ovoga člana obavljaju poslove regulisane profesije samostalno i odgovorno u skladu sa posebnim zakonima i podzakonskim propisima iz oblasti građenja.

Član 6. (Registracija Komore)

- (1) Komora je pravna osoba sa sjedištem koje će se definisati Statutom Komore.
- (2) Komora se upisuje u sudski registar te ima svoj znak, pečat i žigove.

Član 7. (Ovlasti Komore)

- (1) Komora obavlja javne ovlasti koje su propisane ovim Zakonom.
- (2) U postupcima koji se vode prema ovom Zakonu primjenjuju se odredbe Zakona o upravnom postupku („Službene novine Federacije Bosne i Hercegovine“, broj: 2/1998, 48/1999 i 61/2022), osim u postupku pred Disciplinskim sudom i Višim disciplinskim sudom Komore.

Član 8. (Članstvo u Komori)

- (1) Članovi komore mogu biti osobe iz člana 1. ovog Zakona.
- (2) Članovi Komore ostvaruju svoje interese u Komori neposredno u stručnim oblicima organiziranja i posredno preko svojih izabranih predstavnika u tijelima Komore i drugim organizovanim oblicima rada utvrđenih Statutom Komore.
- (3) Komora sarađuje s drugim komorama i odgovarajućim udruženjima u zemlji i inostranstvu.
- (4) Komora sarađuje s organima uprave naročito u postupku izrade propisa iz područja prostornog planiranja i građenja, i to:
 - a) učestvujući u radu radnih grupa na izradi zakona i podzakonskih akata,
 - b) davanjem mišljenja, prijedloga i primjedbi na prijedloge zakona i podzakonske akate, te upućivanjem inicijativa za donošenje novih propisa od interesa za njezine članove.

POGLAVLJE III - JAVNOST RADA

Član 9. (Javnost rada Komore)

- (1) Rad Komore je javan.
- (2) Komora osigurava javnosti i zainteresiranim osobama pristup informacijama o svom

radu u skladu sa odredbama posebnih propisa kojima se uređuje pravo na pristup informacijama i objavama na mrežnim stranicama Komore.

POGLAVLJE IV - TIJELA KOMORE

Član 10. (Tijela Komore)

- (1) Tijela Komore su: Skupština, Upravni odbor, Nadzorni odbor, te druga tijela propisana ovim Zakonom i Statutom Komore.
- (2) Tijela Komore nezavisna su i samostalna u obavljanju poslova iz svojeg djelokruga.

Član 11. (Skupština Komore)

- (1) Skupština Komore najviše je tijelo Komore koje odlučuje dvotrećinskom većinom prisutnih članova u skladu sa ovlaštenjima datim ovim Zakonom i Statutom Komore.
- (2) Skupštinu Komore čine predstavnici članova komore ravnomjerno zastupljeni po kantonima.
- (3) Skupštinu Komore čine predstavnici svih kantonalnih inženjerskih komora. Ako u kantonima nisu formirane odgovarajuće inženjerske komore, onda predstavnike u skupštinu Komore imenuje kantonalna Vlada na prijedlog nadležnog ministarstva za prostorno planiranje i građenje.
- (4) Predstavnici iz stava (3) ovog člana, su po jedan od sljedećih zanimanja:
 - a) dipl. inž.arh. – mag. arhitekture ili bachelor arhitekture,
 - b) dipl.inž.građ. – mag. građevinarstva ili bachelor građevinarstva,
 - c) dipl. inž. stroj. – mag. mašinstva ili bachelor mašinstva,
 - d) dipl.inž.elektrotehnike – mag.elektrotehnike ili bachelor elektrotehnike,
 - e) dipl. inž. saobraćaja – mag. saobraćaja ili bachelor saobraćaja,
 - f) predstavnik ostalih zanimanja odgovarajuće stručne spreme, a koji su vezani za prostorno planiranje i gradnju.
- (5) Predstavnici iz stava (3) imenovanjem u Skupštinu Komore obavezno postaju članovi Komore.
- (6) Skupština Komore iz reda svojih članova bira predsjednika i zamjenika predsjednika Skupštine. Predsjednik i zamjenik predsjednika skupštine ne mogu biti iz istog konstitutivnog naroda niti mogu biti birani u druga tijela Komore.
- (7) Mandat članova skupštine Komore traje četiri (4) godine.

Član 12. (Rad Skupštine Komore)

- (1) Sjednica Skupštine može biti redovna ili vanredna.
- (2) Redovnu sjednicu Skupštine Komore saziva predsjednik Skupštine Komore uz saglasnost zamjenika predsjednika Skupštine Komore najmanje jednom godišnje.
- (3) Predsjednik Skupštine Komore, uz saglasnost zamjenika predsjednika Skupštine Komore, može sazvati vanrednu sjednicu Skupštine Komore u svako doba ako to zbog

rješavanja određenih pitanja pisano zatraži Upravni odbor Komore ili najmanje jedna trećina članova Komore.

Član 13. **(Obaveze Skupštine Komore)**

- (1) Skupština Komore donosi:
 - a) Statut Komore i druge opće akte određene ovim Zakonom i Statutom Komore,
 - b) program rada Komore i prihvata izvještaj o izvršenju tog programa,
 - c) godišnji budžet prihoda i rashoda Komore i prihvata izvještaj o izvršenju tog budžeta,
 - d) poslovnik o radu Skupštine Komore i drugih tijela Komore,
 - e) druge akte određene ovim Zakonom ili Statutom Komore.
- (2) Skupština Komore odlučuje o:
 - a) visini upisnine, članarine i naknade za usluge Komore,
 - b) raspisivanju izbora tijela Komore, te provodi imenovanja i razrješenja u skladu sa ovim Zakonom, Statutom Komore, te drugim općim aktima Komore,
 - c) međusobnim odnosima i saradnji s drugim komorama i udruženjima radi provedbe programa od zajedničkog interesa i
 - d) drugim pitanjima određenim ovim Zakonom ili Statutom Komore.
- (3) Skupština Komore obavlja i druge poslove određene ovim Zakonom i Statutom Komore:
 - a) promovise inženjersku struku i inženjersku djelatnost u cilju zaštite javnog interesa i trećih lica,
 - b) informiše stručnu i širu javnost o svom djelovanju,
 - c) prati dostignuća u Evropi i svijetu iz oblasti tehničkih nauka, i razmjenjuje iskustva,
 - d) daje stručna mišljenja o pojedinim pitanjima u djelatnosti planiranja i projektovanja,
 - e) sarađuje sa svim stručnim komorama u okviru njihovih poslova i zadataka i zastupa njihove interese,
 - f) sarađuje s tijelima uprave na svim nivoima vlasti,
 - g) sarađuje u davanju mišljenja i prijedloga u radu radnih grupa za izradu zakona i podzakonskih akata u oblasti planiranja i građenja,
 - h) za svoje članove u skladu s odredbama Zakona, drugih zakona i Statuta izdaje mišljenja, upute, potvrde, savjetodavne usluge i sl.,
 - i) potiče edukacije i izdavačku djelatnost svojih članova,
 - j) daje prijedloge u rješavanju pitanja od značaja za inženjersku djelatnost,
 - k) obavlja i druge poslove određene Zakonom, posebnim zakonima i Statutom.

Član 14. **(Upravni odbor Komore)**

- (1) Upravni odbor Komore izvršno je tijelo koje vodi poslovanje Komore i nadležan je za izvršenje programa rada Komore i donesenih odluka.
- (2) Predsjednika, zamjenika predsjednika i članove Upravnog odbora Komore imenuje Skupština Komore iz članova Skupštine Komore.
- (3) Predsjednik Upravnog odbora Komore predsjedava sjednicom i rukovodi radom Upravnog odbora.
- (4) Zadaci Upravnog odbora Komore su da:

- a) provodi odluke i zaključke Skupštine Komore,
 - b) utvrđuje prijedlog Statuta Komore i drugih opštih akata koje donosi Skupština Komore,
 - c) predlaže odluke, zaključke i stavove, te daje mišljenja o pitanjima o kojima Skupština Komore raspravlja,
 - d) utvrđuje i usklađuje interese članova Komore pri oblikovanju mjera ekonomske politike i izrade zakona i podzakonskih propisa,
 - e) procjenjuje učinak važećih propisa i tijelima uprave predlaže nove mjere za jačanje sektora prostornog planiranja i građenja,
 - f) osniva i imenuje članove radnih grupa, komisija, stručnih savjeta, ekspertnih radnih grupa za pojedina područja,
 - g) rješava sva pitanja koja nisu stavljena u nadležnost drugom tijelu Komore.
- (5) Upravni odbor obavlja i druge poslove određene ovim Zakonom i Statutom Komore.
- (6) Upravni odbor Komore sastoji se od najmanje pet (5) članova i imenuju se na period od četiri godine.
- (7) Upravni odbor Komore odgovara za svoj rad Skupštini Komore.

Član 15.
(Nadzorni odbor)

- (1) Nadzorni odbor Komore nadzire:
- a) provođenje Statuta Komore i drugih opštih akata Komore te ostvarivanje prava i ispunjavanje obaveza članova Komore,
 - b) materijalno i finansijsko poslovanje Komore i raspolaganje sredstvima Komore,
 - c) rad Sekretarijata Komore.
- (2) Predsjednika i članove Nadzornog odbora imenuje Skupština Komore iz članova Skupštine Komore.
- (3) Skupština Komore može ovlastiti Nadzorni odbor Komore za obavljanje drugih poslova.
- (4) Članovi Nadzornog odbora Komore ne mogu biti članovi drugih tijela Komore.
- (5) Nadzorni odbor Komore sastoji se od najmanje tri člana i imenuje se na period od četiri godine.
- (6) Nadzorni odbor Komore odgovara za svoj rad Skupštini Komore.

Član 16.
(Predsjednik Upravnog odbora Komore)

- (1) Predsjednik Upravnog odbora Komore predstavlja i zastupa Komoru, odgovara za zakonitost njezina rada, te obavlja druge poslove određene ovim Zakonom i Statutom Komore.
- (2) Predsjednik Upravnog odbora Komore može samostalno odlučivati o sklapanju pravnih poslova čija vrijednost ne prelazi iznos određen Statutom Komore.
- (3) Predsjednik Upravnog odbora Komore odlučuje o sklapanju ugovora o radu te o pravima i obvezama iz radnih odnosa ako Statutom Komore nije drukčije određeno.

- (4) Predsjednik Upravnog odbora Komore i ostali članovi Upravnog odbora Komore odgovaraju za svoj rad Skupštini Komore.

Član 17.
(Sekretarijat Komore)

- (1) Sekretarijat Komore obavlja stručne, administrativne i pravne poslove Komore.
- (2) Radom Sekretarijata Komore upravlja glavni sekretar Komore.
- (3) Pitanja vezana za rad Sekretarijata detaljnije se uređuju Statutom Komore i pravilnikom o radu koje donosi Skupština Komore.

POGLAVLJE V - OPŠTI AKTI KOMORE

Član 18.
(Opšti akti Komore)

Opšte akte Komore i to Statut, kodeks stručne etike, poslovničke i druge opšte akte donose tijela Komore dvotrećinskom većinom prisutnih članova u okviru svojih nadležnosti.

Član 19.
(Statut Komore)

- (1) Statutom Komore bliže se uređuje:
- a) sjedište komore,
 - b) organizacija Komore i tijela Komore,
 - c) postupak izbora i razrješenja članova tijela Komore,
 - d) postupak upisa i način vođenja imenika, upisnika i evidencija Komore,
 - e) prava i dužnosti ovlaštenih prostornih planera, projekatara, voditelja radova građenja/izvođenja i stručnog nadzora,
 - f) disciplinska djela, tijela za pokretanje i vođenje disciplinskog postupka, disciplinski postupak za utvrđivanje povrede dužnosti i ugleda ovlaštenih prostornih planera, projekatara, voditelja radova građenja/izvođenja i stručnog nadzora i disciplinske mjere,
 - g) organizacija i poslovi Sekretarijata Komore i glavnog sekretara Komore,
 - h) druga pitanja određena ovim Zakonom i od važnosti za rad ovlaštenih prostornih planera, projekatara, voditelja radova građenja/izvođenja i stručnog nadzora i za rad Komore.
- (2) Statut Komore donosi Skupština Komore uz prethodnu saglasnost Federalnog ministarstva prostornog uređenja (u daljnjem tekstu: Ministarstvo).
- (3) Ako Ministarstvo u roku od 30 dana od dana kada je zaprimilo nacrt Statuta ne izda saglasnost iz stava (2) ovoga člana, smatra se da je saglasnost data.
- (4) Statut Komore objavljuje se u „Službenim novinama Federacije Bosne i Hercegovine“.

Član 20.
(Kodeks Komore)

- (1) Kodeksom Komore utvrđuje se skup etičkih načela i pravila kojih su se članovi Komore dužni pridržavati pri obavljanju poslova.

- (2) Kodeks Komore osigurava najviši standard profesionalnog ponašanja među članovima Komore koji su dužni svoje usluge pružati potpuno neovisno, nepristrano i pravedno uz poštivanje tajnosti i povjerljivosti poslovanja i ispunjenja obaveza prema Komori.
- (3) Kodeks Komore donosi Skupština Komore.

POGLAVLJE VI - JAVNE OVLASTI

Član 21. (Javne ovlasti Komore)

Komora u skladu s ovim Zakonom ima sljedeće javne ovlasti:

- a) utvrđuje profesionalna prava i dužnosti i etičke norme ponašanja članova u obavljanju poslova izrade planova, projektiranja i izvođenja radova,
- b) vodi imenik članova komore,
- c) vodi imenik ovlaštenih prostornih planera, projektanata, voditelja radova građenja/izvođenja i stručnog nadzora koji su njezini članovi,
- d) vodi imenik stranih ovlaštenih osoba koje su njezini članovi, a koji sadržava struku i stručni smjer ovlaštenih prostornih planera, projektanata, voditelja radova građenja/izvođenja i stručnog nadzora,
- e) vodi upisnik ureda za samostalno obavljanje poslova projektiranja i/ili stručnog nadzora građenja,
- f) vodi upisnik zajedničkih ureda,
- g) vodi evidenciju osoba kojima je priznata inozemna stručna kvalifikacija,
- h) izdaje uvjerenja, odnosno potvrde o činjenicama o kojima Komora vodi službene evidencije,
- i) uspostavlja, organizuje i provodi stručno usavršavanje,
- j) obavlja stručni nadzor nad radom svojih članova,
- k) utvrđuje ispunjenost uslova za sticanje dobijanja ovlaštenja za fizička lica i predlaže ministarstvu izdavanje ovlaštenja za osobe iz tačke c) i d),
- l) organizira sudove časti za utvrđivanje povreda profesionalnih standarda.

POGLAVLJE VII - UPIS U IMENIKE KOMORE, MIROVANJE I PRESTANAK ČLANSTVA U KOMORI

Član 22. (Upis u imenik Komore)

- (1) Upis u imenik, upisnik, odnosno evidenciju iz člana 24. ovoga Zakona, Komora je dužna obaviti u roku od osam dana od dana prijema urednog zahtjeva za upis.
- (2) Akt na temelju kojeg se vrši upis ili promjena stanja u imeniku, upisniku ili evidenciji koji vodi Komora te izvadak i potvrda izdana na temelju podataka iz tog imenika, upisnika ili evidencije, javne su isprave.
- (3) Komora se na javnim ispravama koje izdaje u obavljanju javnih ovlasti koristi pečatom, u skladu s posebnim propisom.

Član 23. (Uslovi za upis u imenik ovlaštenih inženjera)

Pravo na upis u imenik samostalnih ovlaštenih prostornih planera, projektanata, voditelja radova građenja/izvođenja i stručnog nadzora Komore koje svojim aktima utvrđuje Komora.

Član 24.
(Rješenje o upisu)

- (1) Članstvo u Komori stiče se rješenjem o upisu u odgovarajući imenik članova komore.
- (2) Upisom u imenik ovlaštenih inženjera iz oblasti projektovanja i prostornog planiranja stiče se naziv ovlaštenu projektanta u oblasti: arhitekture, građevinarstva, mašinstva, elektrotehnike, saobraćaja i ovlaštenu prostorni planer.
- (3) Upisom u imenik ovlaštenih voditelja radova građenja/izvođenja stiče se naziv: ovlaštenu voditelj građenja/radova arhitektonske struke, samostalni ovlaštenu voditelj građenja/radova građevinske struke, samostalni ovlaštenu voditelj radova mašinske, elektrotehničke struke i saobraćajne struke.
- (4) Osobe iz st. (2) i (3) ovog člana ovlaštene su i za obavljanje poslova stručnog nadzora.
- (5) Rješenje o upisu u odgovarajući imenik donosi Komora te se osobama iz st. (2) i (3) ovoga člana izdaje pečat i iskaznica u skladu sa posebnim propisom.
- (6) Komora može imati počasne članove u skladu s uslovima propisanim Statutom Komore.

Član 25.
(Mirovanje članstva)

- (1) Ovlaštenom prostornom planeru, projektantu, voditelju radova građenja/izvođenja i stručnog nadzora, članstvo u Komori miruje:
 - a) ako je u pritvoru,
 - b) ako mu je izrečena disciplinska mjera zabrane obavljanja poslova,
 - c) ako je izabran ili imenovan na plaćenu javnu dužnost,
 - d) ako se zaposli u tijelima uprave,
 - e) ako to sam zatraži.
- (2) Rješenje o mirovanju donosi nadležno tijelo Komore, po službenoj dužnosti ili na osobni zahtjev.
- (3) Za vrijeme mirovanja ovlaštenim osobama iz stava (1) ovog člana miruju sva prava i obaveze koje proizlaze iz članstva u Komori.
- (4) Rješenje iz stava (2) ovoga člana ukinut će se po službenoj dužnosti ili na lični zahtjev stranke nakon prestanka razloga zbog kojih je određeno mirovanje.

Član 26.
(Prestanak članstva u Komori)

- (1) Ovlaštenom prostornom planeru, projektantu, voditelju radova građenja/izvođenja i stručnog nadzora prestaje članstvo u Komori:
 - a) ako mu je oduzeta poslovna sposobnost,
 - b) ako postane trajno zdravstveno nesposoban za obavljanje poslova,
 - c) ako podnese zahtjev za prestanak članstva u Komori,
 - d) ako je osuđen na bezuvjetnu kaznu zatvora dužu od šest mjeseci,
 - e) ako je svojim radom prouzrokovao štetu opasnu po život, zdravlje ljudi i okoliš,
 - f) ako mu je izrečena sigurnosna mjera zabrane obavljanja dužnosti ili djelatnosti,
 - g) ako je disciplinski kažnjen prestankom članstva u Komori,
 - h) odlaskom u mirovinu ako to pisanim zahtjevom zatraži,

- i) smrću.
- (2) U slučaju prestanka članstva u Komori nadležno tijelo Komore rješenjem određuje brisanje člana iz imenika samostalnom ovlaštenom prostornom planeru, projektanatu, voditelju radova građenja/izvođenja i stručnog nadzora.
- (3) Prestankom članstva u Komori gubi se naziv definisan odredbom člana 24. ovog Zakona.
- (4) Pravo na obavljanje poslova iz člana 24. ovog Zakona prestaje danom pravomoćnosti odluke o oduzimanju poslovne sposobnosti, odluke kojom se izriče sigurnosna mjera zabrane obavljanja dužnosti ili djelatnosti, odnosno odluke o disciplinskoj mjeri prestanka članstva u Komori.
- (5) Pravo na obavljanje poslova iz člana 24. ovog Zakona prestaje danom pravomoćnosti rješenja o brisanju člana iz imenika ovlaštenih inženjera, imenika ovlaštenih voditelja građenja, odnosno imenika ovlaštenih voditelja radova.

Član 27.
(Ponovni upis u članstvo)

- (1) Osoba kojoj je prestalo članstvo u Komori ne smije biti ponovno upisana u imenik Komore:
 - a) ako joj je izrečena sigurnosna mjera zabrane obavljanja dužnosti ili djelatnosti, prije nego što ta mjera istekne ili bude obustavljena,
 - b) ako je podnijela zahtjev za prestanak članstva u Komori, prije nego što istekne šest mjeseci od dana pravomoćnosti rješenja o brisanju člana iz imenika Komore.
- (2) U ostalim slučajevima osoba kojoj je prestalo članstvo u Komori može zahtijevati ponovni upis u imenik Komore kad prestanu razlozi zbog kojih joj je prestalo članstvo.
- (3) Protiv rješenja kojim je odlučeno o upisu u imenik Komore, odbijanju upisa u imenik, mirovanju članstva u Komori ili brisanju člana iz imenika Komore dopuštena je žalba i podnosi se Ministarstvu u roku od osam dana od dana prijema rješenja.

POGLAVLJE VIII - KVALITETA PRUŽENE USLUGE U POSLOVIMA PROSTORNOG PLANIRANJA, PROJEKTIRANJA, VOĐENJA GRAĐENJA I STRUČNOG NADZORA GRAĐENJA

Član 28.
(Kvalitet pružanja usluge)

Kvaliteta pružene usluge ovlaštenih prostornih planera, projektanata, voditelja radova građenja/izvođenja i stručnog nadzora osigurava se upotpunjavanjem i usavršavanjem znanja, stručnim nadzorom nad radom tih osoba te saradnjom Komore i Ministarstva.

Član 29.
(Stručno usavršavanje članova Komore)

- (1) Članovi Komore upotpunjavaju i usavršavaju svoje znanje na način kontinuiranog praćenja razvoja graditeljske struke te stjecanja novih znanja i vještina.
- (2) Načela provedbe stručnog usavršavanja jesu:

- a) dostupnost usavršavanja svima, što podrazumijeva uključivanje u program usavršavanja svih zainteresovanih,
- b) stručna osnovanost usavršavanja uz istodobno prenošenje svjetskih i vlastitih stručnih iskustava i dostignuća,
- c) slobodan izbor podrazumijeva da svaki član komore ima pravo izabrati sadržaj i oblik stručnog usavršavanja koji mu odgovara,
- d) kontinuirana evaluacija pružatelja stručnog usavršavanja, što znači da će sve pružatelje stručnog usavršavanja evaluirati polaznici usavršavanja.

Član 30. (Usavršavanja u organizaciji Komore)

- (1) Komore u okviru trajnog stručnog usavršavanja organiziraju temeljno i napredno usavršavanje za poslove u okviru stručnog područja za koje su osnovane.
- (2) Stručno usavršavanje iz stava 1. ovoga člana obuhvata interdisciplinarna i druga znanja i vještine nužne za uspješno obavljanje stručnih poslova i poslovanje osoba koje rade poslove iz djelokruga Komore.
- (3) Osobi koja je na propisani način završila program stručnog usavršavanja iz stava (2) ovoga člana, Komora izdaje odgovarajući certifikat ili potvrdu.

POGLAVLJE IX - STRUČNI NADZOR

Član 31. (Stručni nadzor)

- (1) Komora provodi stručni nadzor nad radom samostalnih ovlaštenih prostornih planera, projektanata, voditelja radova građenja/izvođenja i stručnog nadzora temeljem javnih ovlasti iz ovoga Zakona i posebnog opšteg akta kojim se uređuje način organiziranja i provođenja stručnog nadzora koji donosi Skupština Komore.
- (2) Ovlasti Komore u provedbi stručnog nadzora nad radom članova prema ovom Zakonu jesu:
 - a) pregledati dokumentaciju koja omogućuje uvid u poslovanje člana Komore za potrebe stručnog nadzora,
 - b) pribavljati akte od odgovornih i drugih osoba o činjenicama koje se ne mogu direktno utvrditi,
 - c) zatražiti pisanih putem tačne i potpune podatke i dokumentaciju potrebnu za provođenje stručnog nadzora,
 - d) obavljati i druge radnje u svrhu provedbe stručnog nadzora.
- (3) Komora je u obavljanju poslova stručnog nadzora obavezna s podacima koji su zaštićeni odgovarajućim stepenom tajnosti postupati u skladu sa posebnim propisima.

Član 32. (Nepravilnosti u radu člana Komore)

- (1) Ako Komora u provođenju stručnog nadzora nad radom članova utvrdi nepravilnosti, dužna je:
 - a) dati potrebne upute za otklanjanje utvrđenih nepravilnosti,
 - b) obavijestiti nadležno tijelo ako su tokom stručnog nadzora nad radom člana Komore uočene nepravilnosti u vezi s kojima nije ovlaštena postupati,
 - c) poduzeti druge potrebne radnje te provesti postupke u skladu s ovim Zakonom i drugim opštim aktima Komore.

- (2) Članovi Komore nad čijim se radom provodi stručni nadzor obvezni su Komori u roku koji im je određen omogućiti provedbu stručnog nadzora i osigurati uslove za neometan rad u okviru ovlaštenja propisanih članom 31. ovoga Zakona.

Član 33.
(Saradnja sa Ministarstvom i Inspekcijom)

- (1) U obavljanju stručnog nadzora iz člana 31. ovoga Zakona, Komora sarađuje s Ministarstvom.
- (2) Ako se pri obavljanju stručnog nadzora utvrdi povreda propisa iz djelatnosti prostornog planiranja i građenja, Komora je dužna o tome bez odgađanja, a najkasnije u roku od 7 dana od dana saznanja, izvijestiti nadležnu inspekciju i Ministarstvo.

Član 34.
(Godišnji izvještaj)

Komora je dužna dostaviti Ministarstvu godišnji izvještaj o provedenim nadzorima nad radom članova Komore, podatke o izrečenim disciplinskim mjerama te prijedloge za unapređenje stručnog nadzora.

POGLAVLJE X – DISCIPLINSKA ODGOVORNOST ČLANOVA KOMORE

Član 35.
(Disciplinske mjere i mirovno vijeće)

- (1) Disciplinske mjere, pravo žalbe, disciplinsku odgovornost članova Komore, kao i utvrđivanje težih i lakših povreda propisat će Komora posebnim propisom koji donosi Skupština Komore.
- (2) Pri Komori se osniva Mirovno vijeće.
- (3) Mirovno vijeće pruža usluge rješavanja sporova mirenjem u kojem jedan ili više izmiritelja pomaže strankama – domaćim i stranim fizičkim osobama da sa drugim fizičkim i pravnim osobama zaključe nagodbu u građanskim, trgovačkim, radnim i drugim imovinsko-pravnim sporovima o pravima kojima slobodno raspolažu.
- (4) Statutom i općim aktom Komore uređuje se organizacija Mirovnog vijeća, nadležnost, postupak, način odlučivanja, obavljanje administrativno-tehničkih poslova, finansiranje i druga pitanja vezana uz rad Mirovnog vijeće.
- (5) Listu izmiritelja utvrđuje Skupština Komore.

POGLAVLJE XI - PROFESIONALNO OSIGURANJE I OSIGURANJE OD ODGOVORNOSTI

Član 36.
(Osiguranje)

- (1) Ovlašteni prostorni planeri, projektanti, voditelji radova građenja/izvođenja i stručnog nadzora i strana ovlaštena osoba dužni su osigurati se od profesionalne odgovornosti, primjereno vrsti i stepenu opasnosti, za štetu koju bi obavljanjem poslova, odnosno djelatnosti mogli učiniti investitoru ili drugim osobama za sve vrijeme obavljanja poslova, odnosno djelatnosti, pri čemu iznos osiguranja ne može biti manji od 100.000,00 KM.

- (2) Komora preuzima osiguranje od profesionalne odgovornosti svojih članova: ovlaštenih prostornih planera, projektanata, voditelja radova građenja/izvođenja i stručnog nadzora, te stranih ovlaštenih osoba, a članovi Komore dužni su Komori plaćati naknadu za profesionalno osiguranje.
- (3) Kršenje obaveze osnovnog osiguranja, odnosno neplaćanje naknade za profesionalno osiguranje Komori teža je povreda dužnosti prostornog planera, projektanata, voditelja radova građenja/izvođenja i stručnog nadzora, te strane ovlaštene osobe.
- (4) Profesionalno osiguranje ovlaštenog inženjera, ovlaštenog voditelja građenja i ovlaštenog voditelja radova, odnosno strane ovlaštene osobe preko Komore ne isključuje mogućnost njihova dodatnog individualnog profesionalnog osiguranja za štetu koju bi obavljanjem poslova, odnosno djelatnosti mogli učiniti investitoru ili drugim osobama.
- (5) Uslove profesionalnog osiguranja za ovlaštene inženjere, ovlaštene voditelje građenja, ovlaštene voditelje radova i strane ovlaštene osobe zajedno utvrđuju osiguravatelji u dogovoru s komorama.

POGLAVLJE XII - FINANSIJSKO POSLOVANJE I IMOVINA KOMORE

Član 37. (Finansijsko poslovanje)

- (1) Finansijsko poslovanje Komore obavlja se prema godišnjem budžetu prihoda i rashoda Komore.
- (2) Prihodi Komore jesu: upisnina, članarina, naknada za utvrđivanje ispunjenosti uslova za izdavanje ovlaštenja fizičkim osobama i vlastiti prihodi Komore, donacije i druga sredstva ostvarena u skladu sa važećim propisima.
- (3) Visinu upisnine, članarine i visinu naknade za usluge Komore utvrđuje Skupština Komore.
- (4) Računovodstvo Komore obavlja se u skladu sa propisima o računovodstvu neprofitnih organizacija.

Član 38. (Upravljanje sredstvima budžeta)

Sredstvima budžeta upravlja i raspolaže Upravni odbor Komore ako Statutom nije drukčije određeno.

Član 39. (Imovina Komore)

- (1) Imovinu Komore čine njezine nekretnine, pokretnine, novčana sredstva i imovinska prava.
- (2) Komora odgovara za svoje obaveze cijelom svojom imovinom.
- (3) Članovi Komore ne odgovaraju za obaveze Komore čiji su članovi.
- (4) Statutom Komore određuju se tijela ovlaštena za stjecanje, opterećivanje ili otuđenje imovine.

POGLAVLJE XIII - NADZOR

Član 40. (Nadzor nad radom Komore)

- (1) Ministarstvo prati i nadzire zakonitost rada Komore u obavljanju poslova na osnovi datih joj javnih ovlasti.
- (2) U provedbi nadzora, Ministarstvo može tražiti izvještaje, podatke, materijale i druge obavijesti od Komore.
- (3) Ako Ministarstvo u provođenju nadzora utvrdi nepravilnosti u radu tijela Komore u obavljanju javnih ovlasti, rješenjem naređuje otklanjanje tih nepravilnosti.
- (4) Protiv rješenja kojim se naređuje otklanjanje nepravilnosti utvrđenih u provedi nadzora žalba nije dopuštena, ali se može pokrenuti upravni spor.

Član 41. (Transparentnost rada Komore)

Komora ili osoba koja obavlja posao ili djelatnost uređenu ovim Zakonom i posebnim propisom, dužni su Ministarstvu u svrhu provođenja nadzora dostaviti sve tražene podatke, dokumente i izvještaje u zatraženom roku.

POGLAVLJE XIV - PRIJELAZNE I ZAVRŠNE ODREDBE

Član 42. (Prelazne i završne odredbe)

Osobe koje su po propisima koji su bili na snazi do dana stupanja na snagu ovoga Zakona ispunjavale uslove ovlaštenih prostornih planera, projektanata, voditelja radova građenja/izvođenja i stručnog nadzora stiču pravo upisa u Komoru podnošenjem zahtjeva za upis u imenik Komore ovlaštenih prostornih planera, projektanata, voditelja radova građenja/izvođenja i stručnog nadzora.

Član 43. (Rokovi)

Komora je dužna uspostaviti imenike članova komore, imenike ovlaštenih prostornih planera, projektanata, voditelja radova građenja/izvođenja i stručnog nadzora, upisnik stranih lica u roku od dvanaest mjeseci od dana stupanja na snagu ovoga Zakona.

Član 44. (Formati evidencija)

Sve evidencije koje se uspostavljaju na osnovu ovoga Zakona moraju biti u računalnom obliku i u formatu koji je dostupan e-dozvoli.

Član 45. (Stupanje na snagu)

Ovaj Zakon stupa na snagu osmoga dana od dana objave u „Službenim novinama Federacije BiH“.

OBRAZLOŽENJE NACRTA ZAKONA O KOMORI INŽENJERA U OBLASTI GRAĐENJA FEDERACIJE BOSNE I HERCEGOVINE

I USTAVNI OSNOV

Član III. 1. tačka b), koji je izmijenjen amandmanima VIII, LXXXIX i CVI na Ustav Federacije Bosne i Hercegovine i član IV. A. 20. (1) d) Ustava Federacije Bosne i Hercegovine, kojima je propisano da je u isključivoj nadležnosti Federacije, između ostalog, utvrđivanje ekonomske politike, uključujući planiranje i obnovu, te politiku korištenja zemljišta na federalnom nivou.

II RAZLOZI ZA DONOŠENJE PROPISA

Određene profesije čije je djelovanje u javnom interesu se, u svrhu regulisanja i osiguravanja kvalitete rada, okupljaju u profesionalna udruženja. Takav organizacijski oblik svojim posebnim obilježjima, samoregulacijom, te javnim i drugim ovlastima kojima raspolaže treba osigurati ostvarenje javnog interesa u obavljanju niza različitih profesionalnih usluga, ali i unaprjeđivati interese svojih članova te razvoj struke u cjelini.

U cilju unaprjeđenja uslova za obavljanje stručnih poslova u oblasti prostornog i urbanističkog planiranja, projektovanja, građenja građevina i zahvata u prostoru i drugih oblasti značajnih za planiranje i izgradnju, zaštite općeg i pojedinačnog interesa u obavljanju poslova i pružanju usluga iz oblasti prostornog uređenja i građenja bilo je neophodno zakonom utvrditi osnivanje Komore.

Svrha Komore je ostvarivanje interesa inženjera navedenih struka, u smislu definisanja i uređenja tržišta inženjerskih usluga, Komora utvrđuje profesionalna prava i dužnosti i etičke norme ponašanja članova u obavljanju poslova izrade planova, projektiranja i izvođenja radova, vodi imenik ovlaštenih prostornih planera, projektanata, voditelja radova građenja/izvođenja i stručnog nadzora koji su njezini članovi, vodi imenik stranih ovlaštenih osoba koje su njezini članovi, a koji sadrži struku i stručni smjer ovlaštenih prostornih planera, projektanata, voditelja radova građenja/izvođenja i stručnog nadzora, vodi upisnik ureda za samostalno obavljanje poslova projektovanja i/ili stručnog nadzora građenja, vodi upisnik zajedničkih ureda, vodi evidenciju osoba kojima je priznata inozemna stručna kvalifikacija, izdaje uvjerenja, odnosno potvrde o činjenicama o kojima Komora vodi službene evidencije, uspostavlja, organizira i provodi stručno usavršavanje, obavlja stručni nadzor nad radom svojih članova, utvrđuje i daje prijedlog ministarstvu o ispunjavanju uslova za sticanje dobijanja ovlaštenja za fizička lica, vodi imenik članova komore, radi na unaprjeđenju propisa iz oblasti prostornog planiranja i građenja, dostavlja inicijative za donošenje novih propisa od interesa za njene članove, promoviše inženjerske djelatnosti u Federaciji Bosne i Hercegovine na međunarodnom planu, provodi educiranje i usavršavanje u pojedinim oblastima navedenih struka i dr.

Osim toga, Komora svojim djelovanjem doprinosi provedbi odredbi ovog Zakona i podzakonskih akata, naročito u dijelu koji se odnosi na rad ovlaštenih fizičkih osoba, uspostavom Kodeksa strukovne etike, kao i u dijelu promocije projektiranja, prostornog planiranja i građenja, te stalnog usavršavanja inženjera.

Ovim zakonom su utvrđena najbitnija, osnovna pitanja koja se odnose na rad Komore i njen ustroj, dok će se sva druga pitanja od značaja za rad i funkcionisanje Komore utvrditi Statutom Komore i drugim općim aktima Komore.

III OBRAZLOŽENJE POJEDINAČNIH PRAVNIH RJEŠENJA

Općim odredbama ovog Zakona propisana su sljedeća pitanja: predmet Zakona, pojmovi i

definicije i rodno značenje izraza.

Najznačajniji dio Zakona odnosi se na oblik djelovanja Komore kao samostalne stručne organizacije, registraciju Komore, njene ovlasti, način sticanja članstva u Komori, javnost rada, tijela komore, te je detaljno razrađeno svako pojedinačno tijelo Komore, pitanja prekršajnih postupaka, opći akti Komore i kao najvažnije pitanje koje je regulisano odredbama ovog Zakona jesu javne ovlasti Komore koje su propisane odredbom člana 21. Zakona.

Poglavlje VII Zakona odnosi se na upis u imenike, mirovanje i prestanak članstva u komori, a poglavlje VIII reguliše kvalitetu pružene usluge u poslovima prostornog planiranja, projektovanja, vođenja građenja i stručnog nadzora građenja.

Stručni nadzor, disciplinska odgovornost, profesionalno osiguranje, finansijsko poslovanje i imovina komore regulirani su narednim poglavljima, dok je poglavlje XIV reguliralo prijelazne i završne odredbe, odnosno razradilo određena pitanja koja se mogu postaviti kao relevantna u primjeni propisa.

IV OBRAZLOŽENJE FINANSIJSKIH SREDSTAVA ZA PROVOĐENJE ZAKONA

Za provođenje ovog Zakona nije potrebno obezbjediti dodatna finansijska sredstva u Budžetu Federacije Bosne i Hercegovine.

V UČEŠĆE JAVNOSTI

Federalno ministarstvo prostornog uređenja objavilo je tekst Prednacrt zakona o komori inženjera u oblasti građenja na javni uvid dana 29.11.2024. godine, te su pozvani zainteresirani da u roku od 10 dana od dana objave dostave svoje primjedbe, sugestije i mišljenja. Pozvani su također pojedinačno Savez općina i gradova, nadležna kantonalna ministarstva prostornog uređenja i zaštite okoliša.

Dana 06.12.2024. godine, Savez općina i gradova dostavio je akt koji u suštini predstavlja komentar na čl. 26., 28. i 29. Zakona.

Dana 02.12.2024. godine, Zdenko Antunović, dipl.ing. arhitekture dostavio je konkretne prijedloge, koji se tiču samog naziva Zakona, kao i utvrđivanja statusa i javnih ovlasti komore, kao i finansiranja rada Komore, koji su djelimično prihvaćeni i ugrađeni u tekst Zakona.

Dana 05.12.2024. godine, također je dostavljen prijedlog od strane prof. dr sc. Zekan Sabida, prof. dr sc. Ibrahimović Adnana, prof. dr sc. Babajić Elvira, prof. dr sc. Mandžić Kenana i prof. dr sc. Karadžin Zvezdana, koji nisu prihvaćeni, obzirom da se u tekstu Zakona u odgovorajućem dijelu, dosljedno pominju i drugi inženjeri koji sudjeluju u građenju npr. čl. 1., 10. itd.

Također, dana 08.01.2025.godine, zaprimljeno je mišljenje Ministarstva prostornog uređenja, graditeljstva i zaštite okoliša Zapadnohercegovačkog kantona u kojem predlažu da se izmijeni član 14. Prednacrt zakona u dijelu uloge predsjednika komore što je i prihvaćeno tako da sada predsjedavanje sjednicom Upravnog odbora je u nadležnosti predsjednika Upravnog odbora koji inače i rukovodi radom Upravnog odbora.

Što se tiče prijedloga da se na skupštini odluke donose dvotrećinskom većinom, isti prijedlog je prihvaćen i ugrađen u odredbu člana 11. stav (1) ovog Zakona.

VI USKLAĐENOST SA ZAKONODAVSTVOM EUROPSKE UNIJE

Ovim Zakonom izvršeno je usklađivanje sa odredbama EU zakonodavstva, i to dijela koji se odnosi na:

- DIREKTIVU 2005/36/EZ EUROPSKOG PARLAMENTA I VIJEĆA od 07. septembra 2005. godine o priznavanju stručnih kvalifikacija, Sl.I. EU L 255/22, 30.9.2005. - zadnja pročišćena verzija 20.6.2024., CELEX 32005L0036,
- DIREKTIVU 2006/123/EZ EUROPSKOG PARLAMENTA I VIJEĆA o uslugama na unutarnjem tržištu, Sl.I. L EU 376/36, 27.12.2006., CELEX 32006L0123,
- UREDBU (EU) 2016/679 EUROPSKOG PARLAMENTA I VIJEĆA od 27. aprila 2016. godine o zaštiti pojedinaca u vezi s obradom osobnih podataka i o slobodnom kretanju takvih podataka, te o stavljanju van snage Direktive 95/46/EZ, SL L119, 04.5.2016. – pročišćeni tekst 04.5.2016., CELEX 32016R0679.

VII PRIBAVLJENA MIŠLJENJA NADLEŽNIH ORGANA NA PREDNACRT ZAKONA

Ured za zakonodavstvo i usklađenost sa propisima EU

Dana 17.02.2025.godine, zaprimljeno je mišljenje Ureda za zakonodavstvo i usklađenost sa propisima Europske unije sa nizom primjedbi i sugestija kako u odnosu na normativni dio zakona, tako i u odnosu na popunjene instrumente za usklađivanje zakonodavstva - Tablice usklađenosti i Izjavu o usklađenosti kao i Obrazac broj 1a - Obrazac za skraćenu procjenu uticaja propisa u skladu sa Uredbom o procjeni uticaja propisa.

Ovo federalno ministarstvo u potpunosti je postupilo u skladu sa datim primjedbama i sugestijama te korigovani tekst Prednacrt zakona, Tabele usklađenosti, Izjave o usklađenosti i Obrazac 1a dostavilo Uredu na ponovno mišljenje.

Dana 05.3.2025. godine, Ured je dostavio akt kojim je zatražio dodatnu korekciju Obrasca 1a kao i instrumenata za usklađivanje što je i urađeno, da bi potom dostavio Potvrdu da je navedeni proces završen u skladu sa datim uputama za postupanje.

Federalno ministarstvo pravde

Dana, 16.02.2025. godine, Federalno ministarstvo pravde dostavilo je mišljenje na tekst Prednacrt zakona kojim ističe da nema primjedbi i sugestija iz svoje nadležnosti na dostavljeni tekst Zakona.

Federalno ministarstvo finansija

Federalno ministarstvo finansija dostavilo je mišljenje dana 14.03.2025. godine kojim ističe da usvajanje Prednacrt zakona nema fiskalne posljedice na Budžet Federacije BiH i za njegovo provođenje nije potrebno obezbijediti dodatna finansijska sredstva.